

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১১৪/২০১৭

ঢাকা, রোববার ১১ জুন ২০১৭, ২৮ জ্যৈষ্ঠ ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। পেশাজীবীদের সম্মানে প্রধানমন্ত্রীর ইফতার
- ২। চ্যাম্পিয়ন্স ট্রফির সেমি ফাইনালে বাংলাদেশ
- ৩। বাংলাদেশ ক্রিকেট দলকে প্রধানমন্ত্রীর অভিনন্দন
- ৪। প্রধানমন্ত্রী শেখ হাসিনার কারামুক্তি দিবস আজ
- ৫। সমাজের ইতিবাচক পরিবর্তনকে টেকসই করতে হবে : স্পিকার
- ৬। জঙ্গিবাদের বিরুদ্ধে আলেমদের সোচ্চার হতে হবে : স্বরাষ্ট্রমন্ত্রী
- ৭। আগামী নির্বাচনে কোন অগ্রহণযোগ্য ব্যক্তিকে মনোনয়ন দেওয়া হবে না  
: সড়ক পরিবহণ ও সেতুমন্ত্রী
- ৮। ঈদ উপলক্ষে বাস-ট্রেনের অগ্রিম টিকিট আগামীকাল থেকে শুরু
- ৯। ঈদে লঞ্চে অতিরিক্ত যাত্রী উঠলে কঠোর ব্যবস্থা : নৌপরিবহণমন্ত্রী
- ১০। ২০১৬ সালে বাংলাদেশে বৈদেশিক বিনিয়োগ ৪ শতাংশ বেড়েছে : অর্থনৈতিক সমীক্ষার তথ্য
- ১১। বিরূপ জলবায়ুর কারণে সবচেয়ে ক্ষতিগ্রস্ত দেশের তালিকায় ৬ষ্ঠ বাংলাদেশ

১। পেশাজীবীদের সম্মানে প্রধানমন্ত্রীর ইফতার

প্রধানমন্ত্রী শেখ হাসিনা গতকাল ১০ জুন শনিবার তাঁর সরকারি বাসভবন গণভবনে বিভিন্ন পেশাজীবী সংগঠনের নেতাদের সম্মানে এক ইফতারের আয়োজন করেন। ইফতারে বিভিন্ন সরকারি-বেসরকারি বিশ্ববিদ্যালয়ের উপাচার্য, বিভিন্ন পত্রপত্রিকার সম্পাদক ও সাংবাদিক, সংবাদ সংস্থা ও ইলেক্ট্রনিক মিডিয়ার সাংবাদিক, চিকিৎসক, প্রকৌশলী, আইনজীবী, ব্যবসায়ী, বুদ্ধিজীবী, কবি, লেখক, গায়ক এবং ক্রীড়া ব্যক্তিত্বরা যোগ দেন। প্রধানমন্ত্রী ইফতারে অংশগ্রহণকারী অতিথিদের সঙ্গে কুশলাদি বিনিময় করেন এবং খোঁজ-খবর নেন। ইফতারের আগে দেশের অব্যাহত শান্তি, অগ্রগতি ও সমৃদ্ধি কামনা করে বিশেষ মোনাজাত করা হয়। সূত্র-সংবাদ (শেষ পৃ.,ক.১), ইত্তেফাক (পৃ.১,ক.৬), অবজারভার (শেষ পৃ.,ক.৪), এশিয়ান এজ (শেষ পৃ.,ক.৮)।

২। চ্যাম্পিয়ন্স ট্রফির সেমি ফাইনালে বাংলাদেশ

ইংল্যান্ডের কাছে অস্ট্রেলিয়া হেরে যাওয়ায় বাংলাদেশ প্রথমবারের মতো চ্যাম্পিয়ন্স ট্রফির সেমিফাইনালে উঠেছে। গতকাল শনিবার বার্মিংহামে গ্রুপ পর্বের শেষ ম্যাচে ইংল্যান্ড ডার্কওয়ার্থ এন্ড লুইস পদ্ধতিতে ৪০ রানে হারায় অস্ট্রেলিয়াকে। ইংল্যান্ড জয়ী হওয়ায় প্রতিযোগিতা থেকে ছিটকে যায় অস্ট্রেলিয়া এবং সেমিফাইনালে উঠে বাংলাদেশ। সূত্র-সংবাদ (পৃ.১,ক.৫), ডেইলি স্টার (পৃ.১,ক.১), নিউ এজ (পৃ.১,ক.৩), যুগান্তর, ইত্তেফাকসহ অধিকাংশ পত্রিকা এ বিষয়ে লিড নিউজ ছেপেছে।

৩। বাংলাদেশ ক্রিকেট দলকে প্রধানমন্ত্রীর অভিনন্দন

ব্যাটিং বিপর্যয় থেকে ঘুরে দাঁড়িয়ে জোড়া সেঞ্চুরি করে নিউজিল্যান্ডের বিপক্ষে বাংলাদেশের জয় আনায় সাকিব আল হাসান ও মাহমুদুল্লাহ রিয়াদকে ফোন করে অভিনন্দন জানিয়েছেন প্রধানমন্ত্রী শেখ হাসিনা। এই জয়ের জন্য বাংলাদেশ ক্রিকেট দলকে অভিনন্দন জানিয়েছেন তিনি। গত শুক্রবার মধ্যরাতে কার্ডিফে এই ম্যাচ শেষ হওয়ার পর সেঞ্চুরি করা দুই ব্যাটসম্যানকে প্রধানমন্ত্রী ফোন করে অভিনন্দন জানান। অভিনন্দন জানিয়ে তিনি বলেন, লড়াই করে জেতার আনন্দই আলাদা। লড়াই এর এই ধারা অব্যাহত রাখতে হবে। সূত্র-ইত্তেফাক (পৃ.১,ক.২), সংবাদ (পৃ.১,ক.৮), ইন্ডিপেনডেন্ট (পৃ.১৬,ক.১), নিউ নেশন (পৃ.৭,ক.৪)।

৪। প্রধানমন্ত্রী শেখ হাসিনার কারামুক্তি দিবস আজ

প্রধানমন্ত্রী শেখ হাসিনার কারামুক্তি দিবস আজ। দীর্ঘ ১১ মাস কারাভোগের পর ২০০৮ সালের ১১ জুন সংসদ ভবন চত্বরে স্থাপিত বিশেষ কারাগার থেকে তিনি মুক্তি পান। দিবসটি উপলক্ষে আজ রোববার সকাল ১০টায় দলের নেতৃবৃন্দ প্রধানমন্ত্রী শেখ হাসিনার সঙ্গে সাক্ষাৎ করে তাঁকে অভিনন্দন জানাবেন। দুপুরে বিভিন্ন মসজিদে প্রধানমন্ত্রীর সুস্বাস্থ্য কামনা করে দোয়া করা হবে। সূত্র-ইত্তেফাক (পৃ.২,ক.৬), জনকণ্ঠ (শেষ পৃ.,ক.৬)।

৫। সমাজের ইতিবাচক পরিবর্তনকে টেকসই করতে হবে : স্পিকার

জাতীয় সংসদের স্পিকার ড. শিরীন শারমিন চৌধুরী বলেছেন, সমাজের ইতিবাচক পরিবর্তনকে টেকসই করতে হবে। উন্নয়ন টেকসই না হলে কাজক্ষত উন্নয়ন বাধাগ্রস্ত হবে। তিনি বলেন, সীমিত সম্পদের সর্বোচ্চ ব্যবহার নিশ্চিতের পাশাপাশি তরুণ সমাজের জন্য নিরাপদ আগামী রেখে যেতে হবে। গতকাল রাজধানীর বঙ্গবন্ধু আন্তর্জাতিক সম্মেলন কেন্দ্রে বাংলাদেশ ইয়ুথ লিডারশিপ সেন্টার (বিওয়াইএলসি) আয়োজিত বিওয়াইএলসি অ্যালামনাই অ্যাওয়ার্ডস প্রদান অনুষ্ঠানে প্রধান অতিথির বক্তব্যে তিনি একথা বলেন। সূত্র-সমকাল (পৃ.৫,ক.৫)।

৬। জঙ্গিবাদের বিরুদ্ধে আলেমদের সোচ্চার হতে হবে : স্বরাষ্ট্রমন্ত্রী

স্বরাষ্ট্রমন্ত্রী আসাদুজ্জামান খাঁন কামাল বলেছেন, জঙ্গিবাদের নামে ইসলামকে কলুষিত করা হচ্ছে। এর বিরুদ্ধে আলেম-ওলামাদের সোচ্চার হতে হবে। সবাইকে একযোগে কাজ করতে হবে। গতকাল জাতীয় প্রেসক্লাবে এক আলোচনা অনুষ্ঠানে তিনি একথা বলেন। অনলাইন নিউজপোর্টাল আওয়ার ইসলাম টোয়েন্টিফোর ডটকমের প্রতিষ্ঠাবার্ষিকী উপলক্ষে এই অনুষ্ঠানের আয়োজন করা হয়। সূত্র-ইত্তেফাক (পৃ.২,ক.৫), সমকাল (পৃ.৫,ক.৮), অবজারভার (পৃ.১০,ক.১), এশিয়ান এজ (পৃ.১,ক.৪)।

৭। আগামী নির্বাচনে কোন অগ্রহণযোগ্য ব্যক্তিকে মনোনয়ন দেওয়া হবে না : সড়ক পরিবহণ ও সেতুমন্ত্রী

সড়ক পরিবহণ ও সেতুমন্ত্রী ওবায়দুল কাদের এমপি বলেছেন, জনগণের কাছে অগ্রহণযোগ্য কোনো ব্যক্তিকে আগামী নির্বাচনে মনোনয়ন দেওয়া হবে না। বিভিন্ন জরিপে যাদের নাম আসবে তারাই মনোনয়ন পাবেন। মন্ত্রী গতকাল ঢাকা-চট্টগ্রাম মহাসড়কের কুমিল্লার পদুয়ার বাজার বিশ্বরোড এলাকায় বিআরটিএ ও স্থানীয় প্রশাসনের পরিচালিত ভ্রাম্যমাণ আদালত পরিদর্শন শেষে আলাপকালে এসব কথা বলেন। মন্ত্রী ঈদের আগেই ঢাকা-চট্টগ্রাম মহাসড়কের যেসব স্থানে মহাসড়কের দুই পাশে অবৈধ স্থাপনা রয়েছে তা অপসারণের জন্য হাইওয়ে পুলিশসহ সংশ্লিষ্ট সকলকে নির্দেশনা প্রদান করেন। সূত্র-সংবাদ (শেষ পৃ.,ক.১), ইত্তেফাক (পৃ.১,ক.৬), এশিয়ান এজ (পৃ.১,ক.৪), অবজারভার (শেষ পৃ.,ক.৪)।

৮। ঈদ উপলক্ষে বাস-ট্রেনের অগ্রিম টিকিট আগামীকাল থেকে শুরু

ঈদুল ফিতর উপলক্ষে বাস ও ট্রেনের অগ্রিম টিকিট বিক্রি আগামীকাল থেকে শুরু হচ্ছে। রাষ্ট্রায়ত্ত্ব পরিবহণ সংস্থা বিআরটিসি বাসের অগ্রিম টিকিট বিক্রি শুরু হবে ২০ জুন থেকে। পাশাপাশি ঈদ উপলক্ষে এ বছর সারাদেশের ঈদ স্পেশাল সার্ভিস হিসেবে ৯০০ বাস চালু থাকবে বলে সংস্থাটির সূত্র জানায়। রেলওয়ে প্রতিবারের মতো এবারও ১০দিন আগ থেকে ঢাকার কমলাপুর ও চট্টগ্রাম রেলস্টেশন থেকে আন্তঃনগর ট্রেনের অগ্রিম টিকিট বিক্রি করবে। ১২ থেকে ১৬ জুন এই অগ্রিম টিকিট বিক্রি করা হবে। রেলমন্ত্রী মো. মুজিবুল হক বলেন, টিকেট কালোবাজারি রোধ এবং যাত্রীদের নিরাপত্তা নিশ্চিত করতেও সবরকম ব্যবস্থা নেওয়া হয়েছে। অজ্ঞান পার্টি, মলম পার্টিসহ কোনো গোষ্ঠী যেন যাত্রীদের হয়রানি না করতে পারে, সেদিকে আমাদের নজরদারি থাকবে। এছাড়া টিকিট কালোবাজারি প্রতিরোধে ঢাকা, চট্টগ্রামসহ বড় বড় স্টেশনগুলোতে রেল পুলিশসহ আইনশৃঙ্খলা বাহিনীর সদস্যরা থাকবেন। ট্রেনের সূচিতে যাতে কোনো বিপর্যয় না ঘটে, সেদিকে আমরা বাড়তি নজর দিয়েছি। সূত্র-সংবাদ (পৃ.১,ক.১), জনকণ্ঠ (শেষ পৃ.,ক.৭), এশিয়ান এজ (শেষ পৃ.,ক.১)।

৯। ঈদে লঞ্চে অতিরিক্ত যাত্রী উঠলে কঠোর ব্যবস্থা : নৌপরিবহণমন্ত্রী

নৌপরিবহণমন্ত্রী শাজাহান খান বলেছেন, ঈদে প্রতিটি লঞ্চে ধারণক্ষমতার বাইরে কোনো যাত্রী উঠতে দেওয়া যাবে না। সে ব্যাপারে মালিকদের নির্দেশনা দেওয়া হয়েছে। লঞ্চে অধিক যাত্রী বহন করা হলে লঞ্চে মালিকদের বিরুদ্ধে কঠোর ব্যবস্থা নেওয়া হবে। মাদারীপুরে গতকাল দুই দিনব্যাপী জাতীয় বিজ্ঞান ও প্রযুক্তি মেলায় উদ্বোধন অনুষ্ঠানে নৌপরিবহণমন্ত্রী এসব কথা বলেন। মন্ত্রী আরো বলেন, এবারের ঈদে যাত্রীসেবা নিশ্চিত করতে সরকারের পক্ষ থেকে সব ধরনের পদক্ষেপ নেওয়া হয়েছে। সূত্র-প্রথম আলো (পৃ.৩,ক.৬)।

১০। ২০১৬ সালে বাংলাদেশে বৈদেশিক বিনিয়োগ ৪ শতাংশ বেড়েছে : অর্থনৈতিক সমীক্ষার তথ্য

বিশ্বব্যাপী মন্দাভাব দেখা দিলেও ২০১৬ সালে বাংলাদেশে সরাসরি বৈদেশিক বিনিয়োগ (এফডিআই) বেড়েছে সাড়ে ৪ শতাংশ। ২০১৫ সালের তুলনায় ওই সময়ে ৯৭ কোটি ৩৩ লাখ ডলার বিনিয়োগ বেড়েছে, যেখানে বিশ্বব্যাপী ২০১৬ সালে বিদেশি বিনিয়োগ কমেছে ২ শতাংশ। অন্যদিকে এশিয়ার উন্নয়নশীল দেশগুলোতে বিদেশি বিনিয়োগের প্রবাহ কমেছে ১৫ শতাংশ। অর্থনৈতিক সমীক্ষা ২০১৭ অনুসারে এসব তথ্য জানা গেছে। সূত্র-সংবাদ (শেষ পৃ.,ক.৪), ইন্ডিপেন্ডেন্ট (পৃ.১২,ক.৫), এশিয়ান এজ (পৃ.১১,ক.১)।

১১। বিরূপ জলবায়ুর কারণে সবচেয়ে ক্ষতিগ্রস্ত দেশের তালিকায় ৬ষ্ঠ বাংলাদেশ

গত ২০ বছরে বিশ্বে বিরূপ জলবায়ুর কারণে যেসব দেশ সবচেয়ে বেশি ক্ষতিগ্রস্ত হয়েছে, বাংলাদেশ তার অন্যতম। জার্মানওয়াচ নামের একটি থিঙ্ক ট্যাঙ্কের 'বৈশ্বিক জলবায়ু ঝুঁকি সূচক' অনুসারে ক্ষতিগ্রস্ত ১০টি দেশের মধ্যে বাংলাদেশের অবস্থান ৬ষ্ঠ। তালিকায় থাকা বেশিরভাগ দেশই এশিয়ার। ১৯৯৬ থেকে ২০১৫ সালের মধ্যে জলবায়ুজনিত ১৮৫টি ঘটনায় বাংলাদেশে গড়ে মোট ৬৭৯.০৫ জন মানুষ মারা গেছেন। এর ফলে বাংলাদেশ হারিয়েছে জাতীয় প্রবৃদ্ধির ০.৭৩২৪ শতাংশ। সূত্র-য়ুগান্তর (পৃ.৩,ক.২), প্রথম আলো (পৃ.৩,ক.১), ইন্ডিপেন্ডেন্ট (পৃ.১,ক.২), এশিয়ান এজ (পৃ.১,ক.২)।

সম্পাদকীয়

- ক. **ইত্তেফাক, ইন্ডিপেনডেন্ট, ডেইলি সান, ডেইলি স্টার** : নিউজিল্যান্ডকে হারিয়ে ক্রিকেটে অসাধারণ ও বিস্ময়কর জয়ে বাংলাদেশ ক্রিকেট দলের সংশ্লিষ্ট সবাইকে অভিনন্দন জানিয়ে বিভিন্ন খেলার মাধ্যমে বাংলাদেশকে বহির্বিশ্বে তুলে ধরতে সরকারি-বেসরকারি পৃষ্ঠপোষকতা আরো বাড়ানোর প্রত্যাশা।
- খ. **সংবাদ** : প্রাকৃতিক দুর্যোগ মোকাবিলায় ঘূর্ণিঝড়ের সংকেত সম্পর্কে উপকূলের মানুষকে সচেতন করতে গণমাধ্যমকে অগ্রণী ভূমিকা পালনের আহ্বান।
- গ. **জনকণ্ঠ** : আউটসোর্সিংয়ে ১৫ শতাংশ ভ্যাট অব্যাহতি দেওয়ার প্রণোদনাকে সাধুবাদ জানিয়ে এটি ক্রমবিকাশমান তথ্যপ্রযুক্তি খাতের জন্য গুরুত্বপূর্ণ এবং ইতিবাচক পরিস্থিতি তৈরি করবে বলে প্রত্যাশা।
- ঘ. **প্রথম আলো, ফিনানশিয়াল এক্সপ্রেস** : আকাশপথে পণ্য রপ্তানির জটিলতার ক্ষেত্রে নিরাপত্তার ব্যাপারে বাংলাদেশ যে ভাবমূর্তির সংকটে পড়েছে, সর্বাঙ্গিক প্রচেষ্টার মাধ্যমে সার্বিক নিরাপত্তা জোরদার করে ভাবমূর্তির ঝুঁকি দূর করার সুপারিশ।
- ঙ. **সমকাল** : দীর্ঘ দুই যুগের পরেও চাঁদপুর শিশু একাডেমি ভাড়া বাড়িতে থাকার বিষয় তুলে ধরে অবিলম্বে শিশু একাডেমির নিজস্ব জায়গা ও ভবনের ব্যবস্থা করতে যথাযথ কর্তৃপক্ষের প্রতি আহ্বান।
- চ. **যুগান্তর, যায়যায়দিন** : সামাজিক অপরাধ সীমাহীনভাবে বেড়ে যাওয়ায় উদ্বেগ প্রকাশ করে মানুষের ক্রমবর্ধমান অপরাধ প্রবণতা নিয়ে সমাজবিজ্ঞানী, মনোবিজ্ঞানীসহ সরকারের উচ্চমহলের একটি সিদ্ধান্তে পৌঁছানো জরুরি বলে অভিমত।
- ছ. **ইন্ডিপেনডেন্ট** : রাজধানীতে চিকুনগুনিয়া জ্বরের প্রাদুর্ভাব দেখা দেওয়ায় অতিদ্রুত মশা বিস্তারের স্থানগুলো পরিষ্কার করাসহ রাজধানীর বর্জ্য আবর্জনা ফেলে রাখার স্থানগুলো পরিষ্কার পরিচ্ছন্ন করে মশা নিধন কার্যক্রম জোরদার করার সুপারিশ।
- জ. **ডেইলি সান, প্রথম আলো** : যুক্তরাজ্যের সাধারণ নির্বাচনে জয়ী বাংলাদেশি বংশোদ্ভূত তিন কন্যাকে অভিনন্দন জানিয়ে যুক্তরাজ্যের এই নির্বাচন থেকে বাংলাদেশের অনেক কিছু শিক্ষণীয় রয়েছে বলে অভিমত।
- ঝ. **নিউ নেশন** : মিরপুর ১১ নম্বর সেকশনে বস্তিবাসীদের বসবাসের জন্য ১০ হাজার আবাসিক ফ্ল্যাট নির্মাণের সরকারি পরিকল্পনা যথাযথভাবে বাস্তবায়নের প্রত্যাশা।
- ঞ. **নিউ এজ** : ভূগর্ভস্থ পানির স্তর ১৩০ ফিটের নীচে চলে যাওয়ায় বরেন্দ্র এলাকায় পানীয় জলের সংকটের চিহ্ন তুলে ধরে সরকারকে অতিদ্রুত এ সংকট সমাধানে পদক্ষেপ নেওয়ার সুপারিশ জানিয়ে সম্পাদকীয় প্রকাশ করেছে।

উপ-সম্পাদকীয়

সংবাদ পত্রিকায় প্রকাশিত কলামে উল্লেখ করা হয়েছে, তরুণদের কর্মসংস্থান না বাড়লে উন্নয়ন টেকসই হবে না, ফলপ্রসূ হবে না। সেজন্য বেকারত্ব নিরসন করতে কর্মক্ষম জনশক্তিকে কাজে লাগাতে হবে।

নিবন্ধ ও ফিচার

ইত্তেফাক পত্রিকায় প্রকাশিত 'ডাক্তারদের নিরাপদ কর্মপরিবেশ ও নিরাপত্তা' শিরোনামের নিবন্ধে অভিমত প্রকাশ করা হয়েছে, ডাক্তাররা মানুষকে সেবা দেবার ব্রত নিয়ে এই মহান পেশায় আছেন, তেমনি সরকার ও জনগণকেও তাদের জন্য নিরাপদ কর্ম পরিবেশ তৈরি করে দিতে হবে যাতে করে তারা সেবা দিতে পারেন ও জনগণ সেবা পেতে পারেন।

#

ফাহিমা/শুকলা/মরজিনা/রশীদ/তানিয়া/২০১৭/৯.০০ ঘণ্টা

